

INUIT ATAQATIGIIT INATSISARTUNI



UPA2024/59

2. maj 2024

Edvard Nielsen Aronsen

**Filmiliortut isiginnaartitsisartullu nunatsinneersut nunarsuatta
sinnerani filmiliaminnik filmilianiluunniit peqataaffigisaminnik
takutitsisoqassatillugu peqataanissamut qanoq
tapersersorneqarsinnaanerit pillugu apeqquteqaat aallaavigalugu
oqallisissiaq.**

(Inatsisartunut Ilaasortaq Peter Olsen, Inuit Ataqatigiit)

Oqaaseqaat:

Inuit Ataqatigiit kissaatigaat piorsarsimassutsikkut ingerlatsineq nunatsinnilu
eqqumiitsulioriaatsit assigiinngitsut nukittorsarneqassasut, inuiaqatigiinnut
aammalu atatsimoornermut pissarsiaqaataasumik iluaqutaasumillu
ineriartorsinnaaqqullugit.

Inuit Ataqatigiinniik eqqumiitsuliorneq piorsarsimassuserlu pisuussutitut
naleqarnerulersitsisutut isigaavut, nammineq kinaassuseqarnitsinnik
paasinnittariaasitsinnut pingaaruteqarluinnartoq, inuiattut
ataatsimoornerunissatsinnut nukittorsaaqataasoq. Eqqumiitsuliorneq
piorsarsimassuserlu aamma aningaasarsiornikkut pisuussutitut isigaarput,
tassami piorsarsimassutsikkut uummaarissumik pisoqarfiunerani
periarfissarpassuit suli tamakkiisumik iluaqutigineqanngillat.

Qujanartumik ullumikkut aalasuliornerup silarsuaani aamma nunarput
malugineqarnerujartorpoq, tamannalu inuiaqatigiittut tulluusimaarutissaraarput
aammalu tulluusimaarutigiinnarnagu annerusumik tapersersortariaqarparput.
Isiginnaagassiani angisuuni nunani allamiunik suliarineqartuni

INUIT ATAQATIGIIT INATSISARTUNI



isiginnaartitsisartut nunatsinneersut allaat isiginnaartitsisartut ilinniarsimannikkaluit atorneqariartuinnarnerni maluginiarnarput. Tamanna immini nunatsinnik avammut nittarsaassineruvoq kusanartoq oqaasiinnarmik tapersersortariaqanngisarput.

Nunatut namminiilivikkiartortutut oqassagaanni inuiaqatigiinni piorsarsimassutsikkut pisuussutitta atorluarnerunissai inissaminiippoq, aamma aalasuliornerup silarsuaani. Oqallisissiarlu qiviaraanni inuttaaqataasimasut nunatsinnik nittarsaassisussatta aningaasanut inatsimmi oqaasertaliussatigut periarfissai matoqqavallaartut uanga isumaqarpunga, pingaartumik oscar-innanniuttut ituni. Aningaasanummi inatsit siammasinnerusumik periarfissiisussaangaluaq taamaallaat nunani avannarlerni killernilu kulturikkut suleqatigiiffigisanut tassa NAPA-mut, Island-imut Savalimmiunullu atorneqarsinnaavoq. Aningaasanulli inatsimmi oqaasertat aporfiusut takusinnaangorsimagutsigit aamma allannguisinnaanerput eqqartorsinnaasariaqarparput.

Piorsarsimassutsikkut pissarsiarisinnaasagut annertungaarmata isumaqarpunga oqallisissiami aningaasat taaneqartut qulequttamut eqqartukkatsinnut naleqqiukkaanni amerlanerujussuanngorlutik utersinnaasut. Isiginnaartitsisartut nunarsiuarmioqatitsinnik maluginiarneqassagutta periarfissarlu qulaani taakkarsungara ammarsinnaappat isiginnaartitsisartut atorneqaraluttuinnarnerinik tamanna kinguneqartussaavoq taamaaleriartulereerlunilu, piginnaanilippassuarnimmi nunatsinni peqaratta.

Uanga nammineq suminngaaneerfiga Kullorsuaq eqqaassagaanni Frankrig-imi aalasulioartartunik tusaamasanik kiisalu inuttaasartunik tusaamasanik nunaqqatigut isiginnaartitsisartut ilinniarsimanngitsut suleqatigineqarlutik aalasuliaq Rejsen til Grønland suliarineqarnikuvoq allaat ataatagigaluaara panippullu nukarleq allarpassuillu peqataallutik. Tamakkuluunniit nunarput

INUIT ATAQATIGIIT INATSIARTUNI



avammut nittarsaappaat pingaartumillu aamma nunaqarfimmi inooriaatsimik illoqarfissuarni inooriaaserineqartumik allaalluinnartumik inooriaaseqarnerput nittarsaallugu. Tassa tulluusimaarutissagut oqaasiinnaangitsumillu tapersersugassagut.

Uagut Inuit Ataqatigiinni piorsarsimassutsikkut sulisortagut tapersersortuassavagut aammalu aqutissiueqataarusulluta atugaasa ullumikkornit pitsaanerulernissaannut. Taamaattumik inooqataaffigisinnaavarput oqallissimanerput aallaavigalugu aningaasanut inatsisimmi eqqartorneqartup allangortinneqarsinnaanissaanik siunnersuuteqartoqarsinnaanissaa. Nunatummi namminiilivikkiartortutut ingerlatilluta piorsarsimassutsikkut pisuussutigut tassa isiginnaartitsisartut aalasuliorartullu kinaassutsitsinnik nittarsaassinitsinni atunngikkutsigit angisuumik annaasaqarsinnaasugut uanga isumaqarpunga. Aalasuliammi kikkorpassuarnik isiginnaarneqartarput, aalasuliornermilu sulialittagut atorluarluarutsigit tamanna nunatta ilisimaneqaleraluttuinnarneranik kinguneqarsinnaavoq allaat aningaasarsiornikkut iluaqutinngorsinnaalluni.

Aporfilersuutit inatsisiliornermi tappiiffigisimasatta aaqqissuuteqqinnissaannut Inuit Ataqatigiit siuttuunissatsinnut tunuarsimaangilagut, piorsarsimassutsikkummi tarnikkullu inuiaqatigiit nukittullunga ingerlaqqissagutta kinaassuserpullu naqissusissagutsigu aqutissaq ataasiinnaavoq tassalu piorsarsimassutsikkut pisuussutitta periarfissaasa annertusarnissaat.